

SKIPULAGSSKRÁ

fyrir Hagasjóð í Hraunhreppi.

1. gr.

Sjóðurinn heitir Hagasjóður. Heimili hans og starfssvið skal vera innan Hraunhrepps, milli Hítarár og Álftár.

2. gr.

Guðmundur Bjarnason klæðskeri, Aðalstræti 6, Reykjavík, er stofnandi sjóðsins. Árið 1932 var byrjunarfé sjóðsins afhent hreppstjóranum í Hraunhreppi og síðan aukið mikið 1937 og enn meir 1938.

Sjóðurinn var í ársbyrjun 1994 kr. 958.257.

3. gr.

Sjóðnum er ætlað það hlutverk, sem áður var ákveðið af gefanda:

- 1) Að efla og styðja skógrækt, sandgræðslu og fóðurbirgðir, til minningar um föður stofnandans, Bjarna Jónsson fyrrum bónda í Haga.
- 2) Að styrkja fátækar mæður, börn og gamalmenni og námsfólk ef sérstaklega stendur á, til minningar um móður stofnandans, Bjarmdísí Bjarnadóttur, fyrrum húsmóður í Haga, sem var önnur kona Bjarna í Haga.
- 3) Að styrkja kristilegt félags- eða safnaðarlíf og fræðslu barna og ungmenna á kristilegum grundvelli, til minningar um stjúpmóður stofnandans, Guðlaugu Sigurðardóttur, þriðju konu Bjarna í Haga.

4. gr.

Sjóðinn skal framvegis ávaxta á þann hátt, sem vextir fást hæstir á hverjum tíma, þó má lána úr sjóðnum aðilum búsettum í Hraunhreppi ef nauðsyn ber til, á lægri vöxtum.

Til vaxta telst helmingur (50%) verðbóta af verðtryggðum skuldabréfum og banka-vöxtum, en helmingur bætist við höfuðstólinn.

5. gr.

Höfuðstól sjóðsins má aldrei skerða.

6. gr.

Vaxtatekjur sjóðsins skal nota til framkvæmda samkvæmt ákvæðum 3. gr. Heimilt er að verja allt að $\frac{4}{5}$ hlutum árlegra vaxtatekna. Að öðru leyti leggjast vextir og allar aðrar tekjur við höfuðstólinn.

Fari úthlutun úr sjóðnum ekki fram í eitt ár eða fleiri, er heimilt að eyða öllu því úthlutunarfé, sem sparast hefur, síðar.

7. gr.

Stjórn sjóðsins skipa 3 menn úr Hraunhreppi, kjörnir af sveitarstjórn strax að afstöðnum hverjum almennum sveitarstjórnarkosningum. Stjórn sjóðsins kýs formann úr sínum hópi og skiptir með sér verkum.

Hún hefur á hendi allar nánari ákvarðanir um starfshætti og fjárframlög til fullnustu hlutverkum sjóðsins og yfirumsjón allra framkvæmda er þar af leiða, allt innan þeirra takmarka er sett eru með þessari skipulagsskrá.

Reikningar sjóðsins skulu endurskoðaðir af endurskoðendum sveitarfélagsins.

8. gr.

Sjóðsstjórnin heldur gerðabók. Inn í hana skal færa þessa skipulagsskrá, aðalreikninga sjóðsins árlega, fundargerðir og helstu atriði framkvæmda, sem njóta styrks frá sjóðnum.

9. gr.

Allar ákvarðanir viðvíkjandi sjóðnum skulu gerðar á fundum sjóðsstjórnar. Ákvörðun er þó ekki gild nema hún nái samþykki meirihluta sjóðsstjórnarmanna.

10. gr.

Skipulagsskrá þessari má breyta er tímar líða ef allir sjóðsstjórnarmenn samþykkja breytinguna. Þó má aldrei breyta aðalmarkmiðum sjóðsins að auka og bæta gróður jarðar og lífsskilyrði búpenings, að styrkja fátækt fólk og að viðhalda kristindómsfræðslu og kristilegu safnaðarlífi.

11. gr.

Skipulagsskrá þessi kemur í stað skipulagsskrár fyrir Hagasjóð sem staðfest var 27. febrúar 1980, nr. 196/1980, sem jafnframt er felld úr gildi.

Leita skal staðfestingar dóms- og kirkjumálaráðherra á skipulagsskrá þessari.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytið, 14. nóvember 1994.

F. h. r.

Þorsteinn Geirsson.

Jón Thors.

AUGLÝSING

um breytingu á aðalskipulagi Reykjavíkur 1990 - 2010.

Samkvæmt ósk borgarstjórnar Reykjavíkur hefur skipulagsstjórn ríkisins þann 24. ágúst 1994 staðfest breytingu, sbr. 3. og 4. mgr. 19. gr. skipulagslaga nr. 19/1964, á aðalskipulagi Reykjavíkur 1990 - 2010, frá 20. febrúar 1992.

Breytingin felst í því að lóð fyrir bensínstöð norðan Vesturlandsvegur verður helgunarsvæði Vesturlandsvegur og athafnasvæði.

Borgarstjórn Reykjavíkur tekur að sér að bæta það tjón, er einstakir aðilar kunna að verða fyrir við breytinguna.

Umhverfisráðuneytið, 16. nóvember 1994.

F. h. r.

Ingimar Sigurðsson.

Hrafn Hallgrímsson.